

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-603/14
Sarajevo, 23.5.2014. godine

Z A P I S N I K
24. VANREDNE SJEDNICE DOMA NARODA PARLAMENTA
FEDERACIJE BOSNE I HERCEGOVINE, održane 23.5.2014. godine

Sjednica je počela u 12.20.

Sjednici je predsjedavao Tomislav Martinović, predsjedavajući Doma naroda Parlamenta Federacije BiH.

Prije prelaska na rad predsjedavajući je pozdravio delegate, predstavnike Vlade Federacije i predstavnike akreditiranih medijskih kuća koji prate rad sjednice.

Izostanak sa sjednice opravdali su Đuro Prkačin i Tomislav Mandić.

Na osnovu evidencije Stručne službe, predsjedavajući je konstatovao da sjednici prisustvuje 39 delegata, što čini većinu, te Dom naroda može raditi i punovažno odlučivati.

Nakon toga, predsjedavajući Doma naroda je pozvao prisutne da minutom šutnje odaju počast svim stradalim u područjima pogođenim poplavama.

Potom je predsjedavajući podsjetio delegate da je Vlada Federacije BiH dostavila Prijedlog Izmjena i dopuna Budžeta Federacije BiH za 2014. godinu, Prijedlog Zakona o izmjenama i dopunama Zakona o izvršavanju Budžeta Federacije BiH za 2014. godinu i Izmjene i dopune Finansijskog plana Federalnog zavoda za zapošljavanje za 2014. godinu s prijedlogom da se razmatraju po hitnom postupku.

Na osnovu rezultata glasanja, predsjedavajući je konstatovao da je:

- Dom naroda Parlamenta Federacije BiH jednoglasno (39 glasova) prihvatio da se Prijedlog Izmjena i dopuna Budžeta Federacije BiH za 2014. godinu razmatra po hitnom postupku,
- Dom naroda Parlamenta Federacije BiH jednoglasno (39 glasova) prihvatio da se Prijedlog Zakona o izmjenama i dopunama Zakona o izvršavanju Budžeta Federacije BiH za 2014. godinu razmatra po hitnom postupku,
- Dom naroda Parlamenta Federacije BiH, sa 38 glasova za i uz jedan uzdržani glas, prihvatio da se Izmjene i dopune Finansijskog plana Federalnog zavoda za zapošljavanje za 2014. godinu razmatraju po hitnom postupku.

Predsjedavajući Doma naroda prešao je na utvrđivanje dnevnog reda, te je upitao da li neko ima prijedlog za izmjenu i dopunu dnevnog reda.

Budući da nije bilo prijedloga za izmjene i dopune dnevnog reda, predsjedavajući je stavio na glasanje i konstatovao da je Dom naroda Parlamenta Federacije BiH, sa 38 glasova za, usvojio sljedeći:

DNEVNI RED

1. Informacija o posljedicama prirodne nesreće i prijedlog mjera za njihovo saniranje,
2. Prijedlog Izmjena i dopuna Budžeta Federacije BiH za 2014. godinu - hitni postupak,
3. Prijedlog Zakona o izmjenama i dopunama Zakona o izvršavanju Budžeta Federacije BiH za 2014. godinu - hitni postupak,
4. Izmjene i dopune Finansijskog plana Federalnog zavoda za zapošljavanje za 2014. godinu.

1. Informacija o posljedicama prirodne nesreće i prijedlog mjera za njihovo saniranje

Predstavnički dom Parlamenta Federacije je na 25. vanrednoj sjednici od 22.5.2014. godine razmatrao ovu informaciju i usvojio zaključke i Inicijativu.

Premijer Federacije Nermin Nikšić obrazložio je Informaciju.

Nakon toga Domu naroda se obratio v.d. direktora Federalne uprave civilne zaštite Fahrudin Solak.

U raspravi su učestvovali: Amir Zukić, predsjednik Kluba delegata bošnjačkog naroda koji je pročitao zaključke Kluba, Luka Faletar, predsjednik Kluba delegata hrvatskog naroda koji je pročitao zaključke koje je predložio Klub, Mira Ljubijankić, predsjednica Kluba delegata srpskog naroda koja je pročitala zaključke Kluba, Zoran Jovanović, koji je predložio zaključke, Mijo Matanović, Sretko Radišić, Aner Žuljević, Senaid Begić, Ivo Tadić, Esed Radeljaš i premijer Federacije Nermin Nikšić.

Nakon usaglašavanja predloženih zaključaka, predsjedavajući Doma naroda je pročitao usaglašene zaključke i konstatovao da je Dom naroda jednoglasno (40 glasova) usvojio sljedeće:

ZAKLJUČKE

1. Dom naroda Parlamenta Federacije BiH zahtijeva od Vlade Federacije BiH i svakog ministarstva Federacije BiH, javnih preduzeća, uprava i agencija u Federaciji BiH da odmah i prioritarno, u okviru svojih nadležnosti, poduzmu neophodne mjere saniranja posljedica prirodne nesreće u Federaciji BiH, te izrade nove planove

- sistema zaštite od prirodnih nesreća i dostave ih Parlamentu Federacije BiH.
2. Zadužuje se Vlada Federacije BiH za koordinaciju pomoći ugroženim područjima s ciljem najdirektnije suradnje sa vladama kantona na ugroženim područjima. Držimo nužnim da treba posebno definirati karatkoročne i dugoročne mjere oporavka i revitalizacije poplavama ugroženih područja.
 3. Dom naroda podržava inicijativu Predstavničkog doma Parlamenta Federacije BiH kojom traži od Agencije za bankarstvo Federacije BiH i svih banaka koje posluju na području Federacije BiH da za sva pravna i fizička lica koja su nastradala i pretrpjela štetu u poplavama koje su se desile u proteklom periodu urade reprogramiranje kreditnih obaveza za ta lica i poduzetnike u otplati glavnice kredita za najmanji rok od godinu do dvije godine i da se otplata kredita pomjeri za naredne dvije godine. Predlaže se Parlamentu Federacije BiH da zatraži od Vlade Federacije BiH da Odluku o raspodjeli sredstava o GSM licenci stavi van snage, te da se izvrši revizija te odluke u smislu da se sredstva usmjere na poplavljena područja.
 4. Radi što uspješnijeg organiziranja donatorske konferencije sa međunarodnim predstavnicima pozivamo sve nivoe vlasti na što konkretniju suradnju radi dobijanja neophodnih finansijskih sredstava za obnovu pogođenih područja.
 5. Tražimo da se izvrši prenamjena značajnog dijela sredstava predviđenih za programe poticaja poljoprivredne proizvodnje i usmjeri u sanaciju šteta i obnovu poljoprivredne proizvodnje na ugroženim područjima.
 6. Zadužuje se Vlada Federacije BiH da mjesečno informira Dom naroda Parlamenta Federacije BiH o pruženoj pomoći i sanaciji šteta u ugroženim područjima. Predlaže se Domu naroda da se ova informacija razmatra kao 1. tačka dnevnog reda svake naredne sjednice kako bi se osigurala transparentnost pri dodjeli pomoći i spriječile zloupotrebe.
 7. Zadužuje se Vlada Federacije BiH da u roku deset dana od dana usvajanja ovih zaključaka pripremi po hitnoj proceduri Prijedlog Zakona o osnivanju Fonda za elementarne nepogode Federacije BiH.
 8. Traži se od policijskih i inspekcijskih organa u Federaciji BiH da spriječe svako moguće profiterstvo i zloupotrebu nastale situacije.
 9. Preporučuje se nadležnim organima da razmotre mogućnost dodjele građevinskog zemljišta bez naknade u područjima u kojima je uništena imovina građana.
 10. Kolegij Doma naroda preporučuje da se iz obračunate plaće za svibanj izdvoji iznos od 10% primanja delegata i da se ta sredstva uplate na račun Fonda ili po izboru delegata kao pomoć licima iz ugroženih područja.

11. Ovi zaključci bit će objavljeni u "Službenim novinama Federacije BiH".

2. Prijedlog Izmjena i dopuna Budžeta Federacije BiH za 2014. godinu - hitni postupak

Prijedlog Izmjena i dopuna Budžeta Federacije BiH za 2014. godinu je utvrdila Vlada Federacije.

Predstavnički dom Parlamenta Federacije je na 25. vanrednoj sjednici od 22.5.2014. godine usvojio Prijedlog Izmjena i dopuna Budžeta Federacije BiH za 2014. godinu sa amandmanom koji je Vlada Federacije prihvatila pa je postao sastavni dio Prijedloga Izmjena i dopuna Budžeta. Tom prilikom Predstavnički dom je usvojio Zaključak.

Amandman glasi:

U Izmjenama i dopunama Budžeta za 2014. godinu u razdjelu 23, glava 2301, s ekonomskog koda 8215 – Nabavka stalnih sredstava u obliku prava – uspostava i održavanje jedinstvene baze podataka iznos od 1.324.000,00 KM prenosi se na ekonomski kod 6141 – Tekući transferi drugim nivoima vlasti za hitnu sanaciju klizišta na područjima pogođenim elementarnim nepogodama.

Prijedlog Izmjena i dopuna Budžeta razmatrala su nadležna radna tijela koja su dostavila izvještaje.

Na Prijedlog Izmjena i dopuna Budžeta Federacije BiH za 2014. godinu amandman je podnio Klub delegata hrvatskog naroda.

Prijedlog Izmjena i dopuna obrazložio je Ante Krajina, federalni ministar finansija.

U raspravi su učestvovali: Hajrudin Bećirović, koji je u ime Kluba delegata bošnjačkog naroda predložio zaključak, Luka Faletar, koji je obrazložio amandman u ime Kluba delegata hrvatskog naroda, Zijat Mušić, Tomislav Martinović, Ivo Divković i Ante Krajina, federalni ministar finansija, koji je izjavio da Vlada Federacije ne prihvata amandman Kluba.

Budući da Klub delegata hrvatskog naroda nije odustao od amandmana, predsjedavajući ga je stavio na glasanje i konstatovao da Dom naroda Parlamenta Federacije nije usvojio amandman, jer je za glasalo 14 delegata, 31 delegat je bio uzdržan, a tri delegata su bila protiv.

Potom je predsjedavajući stavio na glasanje zaključak Kluba delegata bošnjačkog naroda i konstatovao da zaključak nije dobio potrebnu većinu glasova, jer je za glasalo 29 delegata, a 11 delegata je bilo uzdržano.

Budući da je izražena sumnja u rezultate glasanja, pristupilo se poimeničnom glasanju koje je izvršio Izmir Hadživdić, sekretar Doma naroda.

Na osnovu rezultata poimeničnog glasanja, predsjedavajući Doma naroda je konstatovao da je Dom naroda Parlamenta Federacije BiH, sa 36 glasova za i uz devet uzdržanih glasova, usvojio sljedeći:

ZAKLJUČAK

Zadužuje se Vlada Federacije BiH da hitno pokrene proceduru u vezi sa analizom izmjene Programa utroška sredstava s kriterijima raspodjele sredstava u svim ministarstvima Vlade Federacije BiH koja u 2014. godini imaju takve programe, te da se izvrši analiza zakona koji uređuju tu oblast a sve radi prilagođavanja pojavama prirodne nesreće koja se desila na području Federacije i koja bi se eventualno mogla desiti.

3. Prijedlog Zakona o izmjenama i dopunama Zakona o izvršavanju Budžeta Federacije BiH za 2014. godinu - hitni postupak

Prijedlog Zakona utvrdila je Vlada Federacije.

Predstavnički dom Parlamenta Federacije je na 25. vanrednoj sjednici od 22.5.2014. godine usvojio Prijedlog Zakona o izmjenama i dopunama Zakona o izvršavanju Budžeta Federacije BiH za 2014. godinu sa jednim amandmanom koji je Vlada Federacije prihvatila pa je postao sastavni dio Prijedloga Zakona. Amandman se odnosi na član 38. stav 1.

Amandman glasi:

U Zakonu o izvršavanju Budžeta Federacije BiH za 2014. („Službene novine Federacije BiH“, br. 99/13 i 31/14) u članu 38. u stavu 1. riječ: „saglasnost“ zamjenjuje se riječju: „mišljenje“.

Prijedlog Zakona razmatrala su nadležna radna tijela i dostavila izvještaje.

Prijedlog Zakona o izmjenama i dopunama Zakona o izvršavanju Budžeta Federacije BiH za 2014. godinu obrazložio je federalni ministar finansija Ante Krajina.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH većinom glasova (41 glas za, jedan glas protiv i četiri uzdržana glasa) usvojio Prijedlog Zakona o izmjenama i dopunama Zakona o izvršavanju Budžeta Federacije BiH za 2014. godinu.

4. Izmjene i dopune Finansijskog plana Federalnog zavoda za zapošljavanje za 2014. godinu - hitni postupak

Izmjene i dopune Finansijskog plana i Odluku o izvršenju izmjena i dopuna Finansijskog plana Federalnog zavoda za zapošljavanje za 2014. godinu dostavila je Vlada Federacije.

Predstavnički dom Parlamenta Federacije je na 25. vanrednoj sjednici od 22.5.2014. godine donio Odluku o davanju saglasnosti na izmjene i dopune Finansijskog plana Federalnog zavoda za zapošljavanje za 2014. godinu i Odluku o davanju saglasnosti na Odluku o izvršenju izmjena i

dopuna Finansijskog plana Federalnog zavoda za zapošljavanje za 2014. godinu.

Izmjene i dopune Finansijskog plana razmatrala su nadležna radna tijela i dostavila izvještaje.

Izmjene i dopune Finansijskog plana Federalnog zavoda za zapošljavanje za 2014. godinu obrazložio je Kenan Rešo, direktor Federalnog zavoda za zapošljavanje.

U raspravi su učestvovali Zoran Jovanović i Kenan Rešo.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH većinom glasova (42 glasa za i dva uzdržana glasa) donio Odluku o davanju saglasnosti na Odluku o izmjenama i dopunama Finansijskog plana Federalnog zavoda za zapošljavanje za 2014. godinu i Odluku o davanju saglasnosti na Odluku o izvršavanju izmjena i dopuna Finansijskog plana Federalnog zavoda za zapošljavanje za 2014. godinu.

Sjednica je završena u 16:46.

Transkript sjednice čini sastavni dio Zapisnika.

SEKRETAR

Izmir Hadživdić

PREDSJEDAVAJUĆI

Tomislav Martinović